

奉行一切檀越施設法會供齋調度持齋者

得食不持齋者不得食此飯一日持齋得六

十萬世餘眾不持齋者六十萬世墮餓鬼中  
何以故此信施難銷故寧吞熱鐵丸不食此  
飯吞熱鐵丸須臾間耳食信施久受大苦五  
百萬世中受餓鬼苦諸有設食之處一切如

法作齋不得懷挾餘殘食歸給妻子若食此  
飯若腋底挾擔後五百當挾熱鐵輪左腋底  
入從右腋底出一切齋飯不可不慎一米化  
作熱丸一切賢者施設福會於先嘗啜此食  
都作殘食唐作此會不如不作何以故諸天  
不歡鬼神不喜此人於先嘗者亦五百世中

受餓鬼苦自今已後欲得福者如法作齋食  
可得福德諸天歡喜百神慶悅天神擁護經  
不虛言福報如影響

佛說護淨經

佛說木棟經

失譯今附東晉錄

聞如是一時佛遊羅閱祇者闍崛山中與大  
比丘衆一千二百五十人俱菩薩無數名稱  
遠聞天人所敬時難國王名波瑠璃遣使來  
到佛所頂禮佛足白佛言世尊我國邊小頻

歲復賊五穀勇貴疫疾流行人民困苦我恒  
不得安卧如來法藏多悉深廣我有憂務不  
得修行唯願世尊特垂矜愍賜我要法使我  
日夜易得修行未來世中遠離衆苦

佛告王言若欲滅煩惱障報障者當貫木棟  
子一百一十八以常自隨若行若坐若卧恒當

至心無分散意稱佛陀達磨僧伽名乃過一  
木棟子如定漸次度木棟子若十若二十若  
百若千乃至百千萬若能滿二十萬遍身心  
不亂無諸詭曲者捨命得生第三炎天衣食  
自然常安樂行若復能滿一百萬遍者當得  
斷除百八結業始名背生死流趣向泥洹永

斷煩惱根獲無上果

信還啓王王大歡喜遙向世尊頭面禮佛稱  
大善我當奉行即勑吏民營辦木棟子以爲  
一具六親國戚皆與一具王常誦念雖親軍  
旅亦不廢置又作是念世尊大慈普應一切  
若我此善得免長淪苦海如來當現身爲我

說法願樂迫心三日不食

佛即應形與諸眷屬來至其宮內而告王曰  
莎斗比丘誦三寶名經歷十歲得成斯陀含  
果漸次修行今在普香世界作辟支佛王聞  
是已倍復修行

佛告阿難何況能誦三寶名經歷萬數但能

聞此人名生一念隨喜者未來生處常聞十  
善說是語時大衆歡喜皆願奉行

佛說木棟經

佛說無上處經

失譯今附東晉錄

如是我聞一時佛在舍衛國祇樹給孤獨園  
爾時世尊告諸比丘有三無上處汝等聽聽  
當爲汝說諸比丘白佛唯然受教佛告比丘  
三無上處者一佛無上處二法無上處三僧  
無上處若諸衆生兩足四足無足多足若色

無色若想無想非想非無想如來於中說無  
上處諸比丘若有衆生能於佛無上處起信  
向心者於天人中得無上果報諸比丘是名  
初無上處復次諸比丘於有爲無爲色無色  
法離欲法爲無上處諸比丘若有衆生能於  
此法無上處起信向心者於天人中得無上  
果報諸比丘是名第二無上處復次諸比丘  
僧無上處者若僧若羣若叢聚若徒衆中如  
來弟子僧爲無上處諸比丘若有衆生能於  
此僧無上處起信向心者於天人中得無上  
果報是名三無上處時諸比丘聞佛所說歡  
喜奉行

學一 七